

В Неделю 4-ю по Пятидесятнице
Собора святых Псково-Печерских
На малей вечерни

На Господи, воззвах: стихиры воскресны на 4, глас 3.

Слава, святых, глас 6:

Приидите, людие христоролюбивии,/ восхвалим днесь преславный
собор преподобных,/ иже во обители Псково-Печерстей/ подвиги
многими угодиша Христу Богу,/ с нимиже и Пречистую
Богоматерь, славяще, величаем.

И ныне, Богородичен воскресен малыя вечерни, глас 3: Превелие
чудо:

На стиховне

Стихира воскресна, глас 3: Страстию Твоею, Христе, омрачивый
солнце:

И стихиры святых, глас 2:

Подобен: Егда от древа:

Приидите, монашеское сословие,/ любовьию воспоим собор
святых,/ иже во обители Псково-Печерстей/ житием своим
равноангельным,/ верою же и труды смиренными/ и
Божественными дарованьи/ улучиша у Христа Бога/ блага
вечная,/ того ради и похвалим их достойно.

Стих: Честна пред Господем/ смерть преподобных Его.

Ублажим днесь лик богоносный,/ преподобных Марка, Иону и
преподобную Вассу,/ иже страну Псковскую благодатию
напоивше,/ учением Христовым вся люди просвещаху,/ и крест
спасительный, яко древо жизни вечныя,/ в дебрех Псково-
Печерских утвердиша,/ и освятиша место сие труды и молитвами
своими,/ темже и Дом Пречистая зде устроиша.

Стих: Блажен муж, бояйся Господа,/ в заповедех Его восхощет
зело.

Похвалим песньми честными/ преподобномученик двоицу,
Корнилия и Вассиана,/ яко друзи быша даже и до смерти,/ и
Дорофея, иже образом Пречистая Печерским/ на стране далече
Ярославстей люди освяти,/ почтим и Лазаря праведна, благодати
таинника,/ ихже молитвами, Христе, спаси души наша.

Слава, святых, глас 1:

Земли Псковския радование,/ обители Печерския крепкое
предстательство,/ соборе святых дивный,/ ныне к вам вси
прибегающе,/ молитвы приносим теплыя/ и любовьию почитаем
память вашу.

И ныне, Богородичен, глас тойже: Се исполнися Исаиино
проречение:

По Ныне отпускаеши: и по Отче наш:

Тропарь воскресен, глас 3: Да веселятся Небесная:

Слава, тропари святых.

И ныне, Богородичен первый, по гласу тропаря святых.

На велицей вечерни

На Господи, воззвах: стихиры на 10, и поем стихиры воскресны

гласа три, и анатолиев един, и святых на 6.

Стихиры святых глас 1.

Подобен: О, дивное чудо:

Блаженна страна Псковская/ и преславна чудесы/ обитель
Печерская,/ имуща вас, соборе дивный,/ отцы наши
преподобнии,/ веселися, Пречистая Доме,/ таковыя почитая
предстатели,/ иже Богородицу и Матерь всем Милосердную/ за
ны

умоляют присно,/ темже, людие, возрадуемся и восхвалим/ сия
молитвенники о

душах наших. (Дважды)

Глас 2:

О сокровищнице Господня,/ личе начальный святых Псково-
Печерских,/ преподобнии Марко, Ионо, мати Вассо,/ явили бо
есте непорочным житием вашим/ образ спасения уставы
Богоданными/ и вся полки бесовския низложили есте,/ темже и
нас ныне от тьмы греховныя избавляете. (Дважды)

Глас тойже:

От юности Христа возлюбивый/ и душу твою добродетельми
удобривый, / Корнилие чудный,/ неустанно учил еси люди вере
Христове/ и обитель Печерскую дивно украсил еси,/ да подвигом
твоим приимеши от Господа венец уготованный нетленный.

Слава, святых, глас 6:

На земли ходиша тесною стезею,/ красных мира отвергошася/ и в
подвизех иноческаго жития Вышних достигоша,/ темже и нас,
иночествующих во обители Печерстей,/ молитвами вашими
обогадите сокровищем нетленным.

И ныне, Богородичен первый гласа: Како не дивимся:

Вход. Прокимен дне. И чтения святых три, преподобническая.

На литии стихиры святых глас 3:

О соборе святых Псково-Печерских,/ просиявший, яко светила
многосветлая,/ во мраце пещеры, Богом зданныя,/ идеже
возгорется в сердцах ваших пламень Духа Святаго,/ сего ради
просветите вся люди верныя/ и моленьми крепкими вашими/
распалайте ны ко Господу любовию,/ во еже спастися
воспевающим вас.

Глас 5:

Умы очищенными/ Пресвятей Троице предстояще, преподобнии,/ и
Тояже славою осеняемии,/ вся ны просветите/ и за чтущая вас
инок множества и люди верныя,/ к мощем честным вашим
приходящия,/ Жизнодавца Христа умолите,/ во еже спастися
душам нашим.

Глас тойже:

Путем тесным/ шествующе, отцы Печерстии,/ дела вашими
явили есте,/ како в широту райскую/ добре ходящий во Христе
вводимы бывают,/ онем же путем, преподобнии,/ приведите ко
Христу и вся верныя.

Слава, святых, глас тойже:

Радуются все люди вернии,/ и земля Псковская ликует,/ празднующи собор святых Печерских,/ их бо житием благочестным/ украсися Церковь Русская,/ Юже Господь таковыми столпы утверди,/ тех молитвами да подаст благодать Свою/ ко спасению душ наших.

И ныне, Богородичен, глас тойже: Храм и дверь еси:

На стиховне стихиры воскресны, глас 3.

Слава, святых, глас 1:

Земли Псковския радование,/ обители Печерския крепкое предстательство,/ соборе святых дивный,/ ныне к вам прибегающе,/ молитвы приносим теплыя/ и чтим любовию память вашу.

И ныне, Богородичен, глас тойже: Се исполнися Исаиино проречение:

Тропарь, глас 6:

Собор святых Псково-Печерских днесь почтим,/ в дребрах лесных обитель чудную основавших,/ и, яко крины, добродетельми процветших,/ и людем правый путь богоподобия указавших,/ молят бо Господа/ миру мир даровати и велию милость.

На утрени

На Бог Господь: тропарь воскресен гласа, дважды.

Слава, тропарь святых.

И ныне, Богородичен воскресен по гласу тропаря святых.

По 1-м стихословии седален, глас 1:

Соборе святых Псково-Печерских,/ преподобнии отцы наши, молим вы прилежно,/ сохраните от бурь и искушений обитель сию,/ дом Пречистыя Богоматере,/ иноков в ней подвизающихся/ и всех верных, тихую пристань zde обретающих.

Слава, и ныне, Богородичен:

Настави ны на путь покаяния, уклоняющия присно к злым безпутием,/ и Препллагаго прогневающия Господа,/ Неискусобрачная, Благословенная Марие,/ прибежище отчаянных человек, Божие обителище.

По 2-м стихословии седален, глас 2:

Днесь обитель Псково-Печерская светло сияет,/ святых отец своих память творящи,/ днесь люди окрестнии радуются,/ во псалмех и пениих славяще Господа,/ Давшаго таковыя предстатели и заступники.

Слава, и ныне, Богородичен:

Тобою, Богородице Приснодево,/ Божественнаго естества быхом общницы, / Бога бо нам Воплотившагося родила еси,/ темже по долгу Тя все благочестно величаем.

Величание:

Ублажаем вас,/ преподобнии отцы наши Псково-Печерстии,/ и чтим святую память вашу,/ наставницы монахов/ и собеседницы Ангелов.

Псалом избранный: Терпя, потерпех Господа: Ипакои гласа.

По полиелеи седален, глас 1:

Наста ныне, отцы богоноснии,/ светозарный собора вашего
праздник,/ проповедует днесь обитель Псково-Печерская/ и
Церковь Русская славу вашу,/ величающе вас Прославльшаго.
Слава, и ныне, Богородичен:

Безневестная Чистая Дево Богородице,/ Едина верных
Предстательнице и Покрове,/ бед и скорбей, лютых обстоятельств вся
избави./ на Тя надежду, Отроковице, имущия,/ и души наша
спаси Божественными мольбами Твоими.

По 50-м псалме стихира, глас 7:

Примите ныне благодарение чад ваших,/ преподобнии отцы
Псково-Печер-стии,/ яко не оставили есте нас любовию отчею/ и
тою страстей наших коварства разоряете,/ да примем от Господа
дарования небесная,/ подражающе деянием вашим
Боголюбезным.

Канон воскресен, глас 3, со ирмосом на 4, и Богородицы на 2, и
святых на 8.

Канон святых, глас 2.

Песнь 1

Ирмос: Во глубине постла иногда/ фараонитское всевоинство
преоруженная сила,/ Воплощщеся же Слово всезлюбный грех
потребило есть,/ препрославлен-ный Господь, славно бо
прославися.

Припев: Все святии Псково-Печерстии, молитвe Бога о нас.

Приидите, инок множества, приидите, духовное сословие и людие
вернии,/ составим лик празднующих,/ днесь духовная наша
трапеза, днесь нам Небесное радование,/ совершающим святую
память отец наших.

Светло совершаем торжество ваше сие и достойно почитаем вы,/
преподобнии Марко, Иона, Корнилие, мати Вассо, Вассиане и
Дорофее,/ Богу угодивший и на Небесех со всеми святыми
прославленнии.

Ничтоже возлюбив на земли паче Зиждителя,/ прияли есте труды
и подвига любве ради Христовы,/ темже сподобилися есте
наследия праведных,/ молитвe Хри-ста о нас, почитающих память
вашу.

Богородичен: Достойно есть хвалити Тя, Мира Владычицу,/ яко и
месту сему дольнему даровала еси Небес велелепие,/ мы же,
веселящся, прославляем Тя, Мати щедрот,/ мир подающую
обители сей и велию милость.

Песнь 3

Ирмос: Процвела есть пустыня, яко крин, Господи,/ языческая
неплодящая церковь,/ пришествием Твоим,/ в нейже утвердися
мое сердце.

Притецем ныне, вернии, первоначельника Печерскаго Марка
воспоим велегласно/ и о благочестнем Ионе благодарне
возрадуемся./ их бо молитвами смиренными и во тьме земней
пещер богозданных/ излился благодати Небесныя светолитие
Трисиянное.

Песнями священными воспрославим и тя, преподобная Вассо,/ яко мира сего прелести возгнушавшия,/ возжелела еси образа иноческаго, во еже единому Христу послужити,/ темже и венец брачный на Небесныя славы венец пременила еси.

Достойную похвалу принесем/ преподобномученику Корнилию, игумену премудрому,/ иже и днесь умудряет сердца наша добре,/ направляя нас ко спасению.

Богородичен: Благодатию Твоею, о Богомати,/ нас, скверны всякия исполненных, очисти и укрепи,/ яко ко образу Успения Твоего Печерскому припадающе, взываем сице:/ не остави нас, грешных, но помилуй вся молитвами преподобных отец наших.

Седален, глас 4:

Псково-Печерская похвало, отцы преподобнии,/ явилися есте яко оружницы

Христовы,/ молитвы бо ваща яко меч духовный, грехи посекаяя,/ не престайте

ходатайствовати о чтущих память вашу светло. (Дважды)

Слава, и ныне, Богородичен, глас тойже:

Дево, Мати Благая, миру покрове и заступление,/ не остави обитель Псково-Печерскую, якоже во Успении мира не оставила еси,/ но спасай на Тя уповающия.

Песнь 4

Ирмос: Пришел еси от Девы, не ходатай, ни Ангел, /но Сам, Господи, воплощься,/ и спасл еси всего мя человека./ Тем зову Ти: слава силе Твоей, Господи.

Воспеваем днесь вас любовию, подвижницы Христовы:/ преподобномучениче Вассиане, преподобне отче Дорофее и Лазаре, старче праведный,/ иже процвели есте во обители сей, яко крини райстии.

Радуйся, Церковь Российская, возраде бо в тебе апостольское сеяние Андреево,/ земли Русския украшение, обители чудныя Печерския,/ едина во стране Киевстей, во Псковстей же другая:/ и та о Бозе ликует, и сия веселится, воспевающе соборы святых своих.

Свет спасительный возсия живущим окрест обители Псково-Печерския,/ глас словес Божественных и хвалы Творцу/ потрясе воздух прежде неплодныя пустыни,/ подвигнув верныя непрестанно славословити Христа Жизнодавца.

Богородичен: Богородице Дево, упование наше, моли Сына Твоего и Господа нашего/ сохранить от всех бед и напастей обитель сию, / юже преподобный Корнилий вкупе с подвизавшимися zde созда,/ да вси почерпающии помощь неоскудную от святынь ея/ во вся дни славят и ублажают Тя, в песнях величающе.

Песнь 5

Ирмос: Ходатай Богу и человеком был еси, Христе Боже,/ Тобою бо, Владыко, к Светоначальнику Отцу Твоему/ от нощи неведения/ приведение имамы.

Жития треволнения ни во что же вменив, преподобне отче наш

Марко преблаженне,/ в пустыню Псковскую вселился еси/ и в пещере, Богом зданней, в подвизах мнозех сокровенно пожил еси,/ того ради память твоя пребывает во веки.

Храня веру православную, латиняном не покорился еси/ и, от Юрьева града изшед, Иоанне, иерее Бога Живаго,/ храм Пречистыя в горе ископал еси, возжадав Той послужите во образе иночестем,/ наречен быв Иона, в души своей богатство Духа Святаго собрал еси, преблаженне.

Егда болезнь смертная постиже тя,/ прияла еси образ ангельский, преподобная мати Вассо,/ гроб же твой по кончине силою Божию изнесен бысть двукраты из земли,/ да притекают людие вернии к раце мощей твоих.

Богородичен: Вся упования наша в Тебе, Мати Дево, имуще,/ молим Тя, яко святых Славу и Владычицу милосердную:/ даруй нам, преподобных Твоих ради, грехов исправление/ и иноческому житию споспешествуй присно, подаючи благодать Свою неоскудну.

Песнь 6

Ирмос: В бездне греховней валяясь,/ неизследную милосердия Твоего призываю бездну:/ от тли, Боже, мя возведи.

Явился еси, преподобномучениче Корнилие,/ благочестия дивный наставник и обители Печерския строитель изрядный,/ украсил еси ю храмы святыми, такожде и окрест воздвизал еси их, чудь просвещая,/ ныне же в обители пребывая Небесней и Троице Святей предстоя выну, моли спастися душам нашим.

Оболгаша тя, отче Корнилие, льстецы злобнии,/ к безумию склонися царь Грозный и смерти тя предаде,/ темже и освятися твоею кровию обитель Псково-Печерекая,/ и обогатишася тобою чада твоя, ту иночествующая, яко заступником пред Богом.

Памятующе подвиги твоя и борения и кончину от руки самодержца Российскаго,/ скорбящая братия Псково-Печерская/ храм устроиша во имя твое, преподобномучениче Корнилие,/ в немже безкровную жертву приносят, хваляще и благословяще Бога.

Богородичен: Яже снабдением пскович благоверных и труды преподобных созданный,/ почитаем пречестныя иконы Твоя, Богородице, просиявшия во обители Псково-Печерстей:/ Одигитрии, Звезды путеводныя, Успения и Умиления чудна,/ и, духовно веселящася, яко Саму Тя, лобызаем, христианом Похвало и спасения Утверждение.

Кондак, глас 2:

Подобен: В молитвах неусыпающую:

Тебе, Богородице/ и Деве Чистой, за вся люди Бога умоляющей,/ обитель Псково-Печерская/ святых своих, яко дар, днесь приносит,/ твоих же даров богатство кто исповесть,/ яко и в рай возвела еси отцы наша.

Икос:

Яко сад благоуханный, процвела есть обитель Псково-Печерская

святыми Твоими, Господи,/ ихже молитвами обилие милости
Божия источися на месте сем, по словеси премудраго:/ елика аще
помолится Тебе на месте сем,/ и Ты услышиши на месте жилища
Твоего на Небеси, и сотвориши и милостив будеши им./Сея
милости причастницы бывше, смиренно молим Тя, Христе:/
милостив буди ныне и присно ко\ святей обители сей,/ молитвами
преподобных отцев наших, ихже Пречистая Богородица в рай
введе.

Песнь 7

Ирмос: Богопротивное веление беззаконнующаго мучителя/
высок пламень вознесло есть. / Христос же простре Богочестивым
отроком росу духовную, / Сый благословен и препрославлен.

Времена и лета Церкви Псковския изъявил еси нам,
преподобномучениче Вассиане,/ Корнилию богомудрому в
летописании помогаая изрядно, таже и делом его ревнитель быв
славный,/ ныне же с ним во Свете Трисияннем вопиеша
согласно:/ благословен еси, Боже отец наших.

В трудех постнических яко благодати росу испивал еси вкупе со
отцем нашим Корнилием, Вассиане подобномучениче,/
также и чашу смертную испил еси с ним безвинно,/ и от царя
земнаго к Царю Небесному предпосланы бысте, Тому вопиюще:/
благословен еси, Боже отец наших.

О, подобномучениче Корнилие, не остави и ныне молитвами
твоими чада твоя,/ якоже и прежде ты, защитниче страны
Псковския, не оставил еси ю в нашествие Баториево,/ но, быв ко
Пречистой теплый ходатай, пред Нею предстал еси в видении
чудном над Псковом градом, со святыми вопия:/ благословен еси,
Боже отец наших.

Богородичен: Показа небо православия славу, егда явися на
воздусе Мати всех верных,/ от нашествия же воев Баториевых
Псков град и обитель Печерскую збавльши,/ горе бо святии со
Корнилием Ю умоляху,/ долу же иноцы Печерстии со псковичи
ко образу Ея со слезами припадаху, Богу вопиюще:/ благословен
еси, Боже отец наших.

Песнь 8

Ирмос: Пещь иногда огненная в Вавилоне действия разделяше, /
Божиим велением халдеи опаляющая, / верныя же орошающая,
поющая:/ благословите, вся дела Господня, Господа.

Постнических подвигов желая сподобитися, подобне отче наш
Дорофее,/ во обитель Псково-Печерскую пришед, ветхаго
человека совлеклся еси, добродетелей множеством украсився,/
темже и избра тя Пречистая Дева пренести образ Свой
светозарный из предел Печерских в землю Ярославскую,/ да и
тамо возсияет сугубо благодать Богородицы Преславныя.

Отрасле духовная обители Печерския, богоносе смиренне
Дорофее,/ издревле страна Псковская и страна Ярославская
велию веру к тебе имут,/ яко в первой сам духовно умудрися, во
друзей же иныя умудрял еси, в пустыню Югскую приходя-щая,/

темже ты, угодника Христова, величаем.

Лазаре, благочестия подвижнике, равноангельным и праведным житием твоим в затворе/ явился еси наследник благ вечных,/ такожде и нас, грешных, в покаянии утверди,/ да и мы молитвами твоими просветимся и избавимся от сетей вражиих, отче наш преблаженне.

Богородичен: Богородицу и Матерь Света Ты присно величающе,/ ныне гласы умиленными Ты воспевает, / яко даровала еси нам собор преподобных Псково-Печерских славный, / Едина Чистая и Благословенная.

Песнь 9

Ирмос: Безначальна Родителя Сын, Бог и Господь, / воплощься от Девы, нам явился, / омраченная просветити, собрати расточенная. / Тем Всепетую Богородицу величаем.

Недра земная не сокрыша сокровища мощей ваших, преподобнии Псково-Печерстии, / имиже источаете струи благодати, освящающе души наша, / да и мы внидем ко трапезе Христа Бога и Небеснаго веселия причастницы будем, / ваш собор почитающе.

Величает вас, преподобнии, обитель Псково-Печерская, / на Святей горе во имя ваше храм создавшая, яко споборником крепким в трудах и молитвах, / и просит умильно: молитесь Христа Бога согрешением оставление даровати / чтущим любовь святую память вашу.

Троицен: Триипостасный Боже, Живоначальная Троице, / сохраняй обитель святую сию, / молитв ради преподобных ея, / во вся дни до скончания века.

Богородичен: Радуйся, Обрадованная, / во Успении Твоем нас не оставляющая / и молитвы преподобных отец Псково-Печерских / к Сыну Твоему приносящая о спасении душ наших.

Светилен:

Соборе святых Печерских, / стране Псковстей украшение, / молитесь ко Господу / о всем иночестве Российстем / и о еже просветити чтущия вас любовью.

Стихиры на хвалитех, глас 8:

Духовными песнями преподобных восхвалим, / Марка, Иону, Корнилия, / купно же Вассиана и Дорофея с преподобною Вассою / и Лазаря прозорливаго, схимника Печерскаго, / плотское мудрование духу повянувшия, / пощении и сокровенными подвиги очистившиися, / к нимже взываем: / поминайте нас, чтущих память вашу.

Глас тойже:

Подобен: О, преславнаго чудесе:

О, преподобнии отцы Псково-Печерстии, / равноангельное житие поживше, / труды постническими и добротами духовными / покорили есте тела и души ваша Духу Божию, / и, яко злато в горниле, испыта вас Христос Бог, / темже и обрете вас достойны Себе, / и яко всеплодие жертвенное прият, / молитесь ко Господу / спастися душам нашим.

О, Царице Небесе и земли,/ днесь собор святых Псково-Печерских/ всехвально совершающе,/ вопием Ти:/ Благодатная, радуйся,/ се Сына Твоего угодницы,/ се предстателие за нас пред Богом благочестнии,/ помощию Твоею таковыи содеяшася,/ приими милостивно молитвы их о нас, грешных.

Ина стихира святым, глас тойже:

Преподобнии отцы Псково-Печерстии,/ предстояще за ны соборне Христу Богу,/ утверждение всем верным будите,/ иже к вам припадают, глаголюще:/ радуйтесь, Духа Святаго обиталища прекрасная,/ радуйтесь, Девы Пречистыя честнии служителие,/ радуйтесь, мысленная светила церковная,/ радуйтесь, ко Христу монахов множества приведшии,/ и, яко имущии дерзновение ко Господу,/ молитве спаситися душам нашим.

Слава, глас 8:

Иже Троицы Святыя зарею просвещаемии/ и Престолу Христа Бога выну предстоящи,/ преподобнии отцы Псково-Печерстии,/ примите сие хвалебное пение/ и непрестанно о нас молитесь,/ почитающих верою пречестную память вашу.

И ныне, Богородичен:

Владычице, приими молитвы раб Твоих/ и избави нас/ от всякия нужды и печали.

На Литургии

Прокимен, глас 7: Честна пред Господем/ смерть преподобных Его. Стих: Что воздам Господеву о всех, яже воздаде ми? Апостол к Галатам, зачало 213. Аллилуиа, глас 6: Блажен муж, бояйся Господа,/ в заповедех Его восхощет зело. Стих: Сильно на земли будет семя его. Евангелие от Луки, зачало 24. Причастен: В память вечную будет праведник, от слуха зла не убоится.

УСТАВ

В субботу вечера

На малей вечерни

На Господи, воззвах: стихиры воскресни гласа четыре. Слава, святых, глас 6:

Приидите, христолюбивых людей множество: И ныне,

Богородичен гласа малыя

вечерни: Превелие чудо: На стиховне стихира воскресна, глас 3:

Страстию Твоею, Христе, омрачивый солнце: и стихиры святых,

глас 2, с припевы их. Слава, святых, глас 1: Земли Псковския

радование: И ныне, Богородичен, глас тойже: Се исполнися

Исаиино проречение: По Ныне отпускаеши: и по Отче наш:

тропарь воскресен, глас 3: Да веселятся Небесная: Слава, тропарь

святых. И ныне, Богородичен первый по гласу тропаря святых.

На велицей вечерни

На Господи, воззвах: стихиры на 10. И поем стихиры воскресни

гласа три, и анатолиев един, и святых на 6. Слава, святых. И ныне,

Богородичен первый гласа: Како не дивимся: Вход. Прокимен

дне. И чтения святых три. На литии стихира храма и святых

стихиры. Слава, святых. И ныне, Богородичен в тойже глас, от

стиховных, поемых в Неделю. На стиховне стихиры воскресни гласа. Слава, святых. И ныне, Богородичен в тойже глас, от стиховных, поемых в Неделю. На благословении хлебов тропарь: Богородице, Дево, радуйся: дважды, и тропарь святых, единожды. На утрени

На Бог Господь, тропарь воскресен гласа, дважды. Слава, тропарь святых. И ныне, Богородичен первый, по гласу тропаря святых. Кафисма. Ектения малая. Седальны воскресны с Богородичном настоящего гласа.

Кафисма. Ектения малая. Седальны воскресны с Богородичном их.

Хвалите Имя Господне: Священнослужители поют величание. Певчие поют стих и то же величание. Благословен еси, Господи: Ангельский собор: Ипакои гласа из Октоиха. Седальны оба святых. Слава, полиелейный седален. И ныне, Богородичен его. Степенна гласа. Прокимен воскресный гласа. Всякое дыхание: Евангелие воскресное рядовое. Воскресение Христово видевшие: Псалом 50-й. Слава: Молитвами апостол: И ныне: Молитвами Богородицы: Воскрес Иисус от гроба: Спаси, Боже, люди Твоя: Канон воскресен гласа со ирмосом на 4, и Богородицы на 2, и святых на 8. Катавасия: Отверзу уста моя: По 3-й песни кондак и икос святых и седален их.